



Effektar av traktorkøyring, gjødsling og frøblanding på avling, botanisk samansetjing, fôrkvalitet, nitrogen- opptak og nitrogenfiksering i eng

Delrapport frå prosjektet: Proteinrike engbelgvekster under ulike dyrkings- og klimaforhold

NIBIO RAPPORT | VOL. 3 | NR. 81 | 2017



Tor Lunnan, Synnøve Rivedal, Ilevina Sturite
Divisjon for matproduksjon og samfunn/Fôr og husdyr

TITTEL/TITLE

Effektar av traktorkøring, gjødsling og frøblanding på avling, botanisk samansetjing, fôrqualitet, nitrogenopptak og nitrogenfiksering i eng

FORFATTER(E)/AUTHOR(S)

Tor Lunnan, Synnøve Rivedal, Ievina Sturite

DATO/DATE:	RAPPORT NR./ REPORT NO.:	TILGJENGELIGHET/AVAILABILITY:	PROSJEKTNR./PROJECT NO.:	SAKSNR./ARCHIVE NO.:
07.06.2017	3/81/2017	Open	4210136	17/01957
ISBN: 978-82-17- 01873-5	ISSN: 2464-1162		ANTALL SIDER/ NO. OF PAGES: 27	ANTALL VEDLEGG/ NO. OF APPENDICES:

OPPDRAKGSGIVER/EMPLOYER:

NIBIO

KONTAKTPERSON/CONTACT PERSON:

Tor Lunnan

STIKKORD/KEYWORDS:

Jordpakking, eng, avling, kvalitet, N-fiksering

Soil compaction, grassland, yield, quality, N fixation

FAGOMRÅDE/FIELD OF WORK:

Fôr og husdyr, agronomi

Grassland and livestock, agronomy

SAMMENDRAG/SUMMARY:

The weight of tractors and farm machinery has increased in recent years. We have examined how tractor traffic affects physical properties of soil, grassland yields, botanical composition and forage quality of pure grass and mixtures of grass and clover stands at three locations in Norway; Tjøtta in Nordland county, Fureneset in Sogn and Fjordane and Løken in Oppland. Tractor traffic reduced yields (20 %) on silty soil at Løken, while there was a moderate decline (6 %) on silty sand at Fureneset, and no yield effect on sandy soil at Tjøtta. The tractor weight gave small yield effects, however, the results show that one should avoid traffic on silty soils under wet conditions whenever possible. Tractor traffic on silty soil changed the botanical composition at Løken. Red clover and dicot weeds decreased by traffic, while white clover and grass weeds (*Poa annua*, *Alopecurus geniculatus*) increased. Traffic on silty soil also reduced nitrogen uptake and biological N fixation. Use of clover in the seed mixture gave a large positive effect on yield and forage quality. Use of 60 kg N in mineral fertilizer after the first cut increased grass yields, but reduced the clover content and the biological N fixation. Nitrogen fertilizer and use of clover changed the grass composition in direction of more timothy and less meadow fescue. An increase from 15 % to 30 % clover in the seed mixture gave small effects on yields and botanical composition, but increased the biological N fixation by 5 kg N ha⁻¹ year⁻¹.



NIBIO

NORSK INSTITUTT FOR
BIOØKONOMI

LAND/COUNTRY: Norge
STED/LOKALITET: Løken, Fureneset, Tjøtta

GODKJENT /APPROVED

Ragnar Elvam

NAVN/NAME

PROSJEKTLEDER /PROJECT LEADER

Tessina Sturte

NAVN/NAME

Føreord

Utviklinga mot stadig tyngre traktorar og hausteutstyr i eng er ein realitet i praktisk engdyrkning. I 2010 vart det etablert forsøksfelt på tre NIBIO-stasjoner (Fureneset, Løken og Tjøtta) og tre felt i samarbeid med Norsk Landbruksrådgiving (NLR) i Buskerud, Sogn og Fjordane og Troms for å undersøke verknaden av køyring på jordpakking, engavling, varighet av klover og nitrogenfiksering. Dette arbeidet var ein del av prosjektet «Proteinrike engbelgvekster under ulike dyrkings- og klimaforhold» (prosjektnummer i NFR 199397/199; prosjektperiode 2010-2014) som var finansiert via Fondet for forskningsavgift på landbruksprodukter (FFL) og Forskningsmidler over Jordbruksavtalen (JA). I tillegg fekk prosjektet finansiell støtte frå FMLA i Nordland, Troms, Finnmark, Rogaland, Hordaland, Sogn og Fjordane, Oppland, Buskerud og Hedmark og frå Felleskjøpet Agri og Strand Unikorn. Denne rapporten omfattar delar av arbeidspakke 1 i prosjektet og omhandlar resultat frå feltforsøka på NIBIO-stasjonane. Rapporten er utarbeidd av Tor Lunnan, som og hadde ansvar for feltet på Løken. Synnøve Rivedal hadde ansvar for feltet på Fureneset og Ievina Sturite for feltet på Tjøtta. Ievina Sturite var prosjektleiar for dette prosjektet.

Med hjelp av tilleggsfinansiering frå AGROPRO-prosjektet vart forsøksperioden utvida med to år på Løken og Fureneset.

Løken, 07.06.17

Tor Lunnan

Innhold

1 Samandrag	6
2 Innleiing	7
3 Materiale og metode	8
4 Resultat.....	10
4.1 AVLING.....	10
4.1.1 Effektar av traktorkøring	10
4.1.2 Effektar av frøblanding og gjødsling.....	10
4.2 Plantebestand.....	11
4.2.1 Kløver	12
4.2.2 Sådde grasartar	15
4.2.3 Ugras	16
4.3 Fôrkvalitet.....	17
4.3.1 Energiverdi, innhold av fiber (NDF, ufordøyelag NDF)	17
4.3.2 Protein, aske og vassløyseleg karbohydrat	18
4.4 Nitrogenopptak og nitrogenfiksering	19
4.4.1 Nitrogenopptak	19
4.4.2 Nitrogenfiksering.....	21
5 Diskusjon.....	23
5.1 Effektar av traktorkøring	23
5.2 Effektar av gjødsling etter førsteslåtten	23
5.3 Effektar av frøblanding	24
6 Konklusjon	25
Litteratur	26

Samandrag

Vekta på traktorar og utstyr har auka mykje sidan eldre feltforsøk med jordpakking i eng vart utført i Noreg. Vi har undersøkt korleis køyring med dagens traktorar påverkar jordfysiske forhold, avling, plantesetnad og forkvalitet av rein graseng og kløverblanda eng i ein forsøksserie på tre einingar i NIBIO, på Tjøtta i Nordland, på Fureneset i Sunnfjord og på Løken i Valdres. Traktorkøyring gav stor avlingsnedgang (20 %) på siltjord i Valdres, medan nedgangen var meir moderat (6 %) på siltig sandjord på Fureneset og det var ingen avlingseffekt på sandjord med god luftveksling på Tjøtta. Det var små forskjellar mellom bruk av lett eller tung traktor, og resultata viser at ein i størst mogleg grad bør unngå køyring under våte forhold på jord som er utsett for pakkingskade. Køyring på siltjord førte til endringar i den botaniske samansetnaden i enga ved at raudkløver og tofrøblada ugras gjekk tilbake og kvitkløver og grasugras gjekk fram. Køyring på siltjord reduserte også opptak og fiksering av nitrogen. Bruk av kløver i frøblandinga gav stor positiv effekt på avling, protein- og mineralinnhald og gav lågare fiberinnhald i føret. Bruk av 6 kg N i mineralgjødsel etter førsteslått gav god avlingseffekt, men reduserte kløverinnhald og biologisk nitrogenfiksering. Sterkare nitrogengjødsling og bruk av kløver endra grasbestanden i enga i retning av meir timotei og mindre engsvingel. Auke i såmengda av kløver frå 15 % til 30 % på vektbasis gav små utslag på avling og botanisk samansetjing, men auka N-fikseringa med 0,5 kg per dekar og år.



Bilete 1. Kløver i frøblandinga gav stor positiv effekt på avling, protein- og mineralinnhald. Foto: Synnøve Rivedal

1 Innleiing

Jordpakking kan redusere engavlingane gjennom redusert rotvekst og næringsopptak og redusert porevolum og mindre luftveksling i jorda. I tillegg kjem direkte fysisk skade på engplantane ved køyring. Den fysiske skaden blir mykje større når traktoren slurar, og i forsøk gav sluring større negativ effekt på avlinga enn tyngda på traktoren (Ullring og Lunnan 1993).

Verknad av køyring på grasavlingane på forskjellige jordtypar er godt belyst under norske forhold (Tveitnes og Njøs 1975, Myhr og Njøs 1983, Volden et al. 2002; Rivedal et al. 2016). Effekta av køyring på botanisk samansetjing i enga, forkvalitet og nitrogenfiksering hos kløver er mindre undersøkt. Celius (1991) fann at hundegras (*Dactylis glomerata*) var meir ømtålig for køyreskadar enn engsvingel (*Festuca pratensis*), timotei (*Phleum pratense*) og strandrøyr (*Phalaris arundinacea*) i forsøk i Trøndelag. I forsøk i Valdres var det tendensar til at hundegras og bladfaks (*Bromus inermis*) vart mindre påverka av køyring enn engsvingel og timotei (Ullring og Lunnan 1993). Myhr og Njøs (1983) fann mindre krypsoleie (*Ranunculus repens*) og engrapp (*Poa pratensis*) på pakka enn på upakka ledd i forsøk på Fureneset og Vågønes. I forsøk i Tromsø vart derimot sådd gras redusert av pakking, og innhaldet av tunrapp (*Poa annua*), knereverumpe (*Alopecurus geniculatus*) og krypsoleie auka (Haraldsen et al. 1995). Dette skuldast større overvintringsskade på pakka enn på upakka ledd. Hansen (1996) fekk reduksjon av raudkløver (*Trifolium pratense*), og auke i kvitkløver (*Trifolium repens*) og alsikekløver etter pakking. Ugrasfloraen endra seg også, slik at det vart meir grasugras og mindre tofrøblada ugras etter pakking.

Vekta på traktorar og utstyr har auka mykje sidan ein del av dei tidlegare feltforsøka i Norge vart utført. Målet med denne undersøkinga var å undersøke korleis køyring med dagens traktorar påverkar jordfysiske forhold, avling, plantesetnad og forkvalitet av rein graseng og kløverblanda eng. Det er koyrt ein forsøksserie på tre einingar i NIBIO, der traktorkøyring, gjødslingsnivå og frøblandingar med og utan kløver går inn. Resultat for jordfysiske målingar er viste i ein annan rapport (Rivedal et al. 2016). Denne rapporten har fokus på avling, botanisk samansetjing, forkvalitet og biologisk nitrogenfiksering hos kløver.



Bilete 2. Vekta på traktor og utstyr har auka mykje dei siste åra. Foto: Synnøve Rivedal.

2 Materiale og metode

Forsøksfelt med jordpakking vart lagt ut ved tre NIBIO-stasjonar, Fureneset i Sunnfjord ($61^{\circ}22'N$, $5^{\circ}24'Ø$; 10 m o.h.), Tjøtta på Helgeland ($65^{\circ}49'N$, $12^{\circ}25'Ø$; 10 m o.h.) og Løken i Valdres ($61^{\circ}14'N$, $09^{\circ}07'Ø$; 495 m o.h.), våren 2010. På Tjøtta vart feltet lagt ut på mellomsand, på Fureneset var jordarten siltig mellomsand og på Løken silt. Detaljerte opplysningar om værforhold, jord og jordfysiske forhold er gitt hos Rivedal et al. (2016). Feltet på Tjøtta vart avslutta våren 2014, medan feltet på Løken og Fureneset gjekk vidare ut vekstsesongen 2015.

Forsøksplanen var faktoriell (split-plot) med tre gjentak med følgjande faktorar randomiserte:

A. Jordpakking

- A1: Inga køyring
- A2: Lett traktor (3-4 tonn), dobbel spordekking
- A3: Tung traktor (6-7 tonn), dobbel spordekking

B. Gjødsling

- B1: Husdyrgjødsel, ca. 11 kg total-N/daa om våren
- B2: Husdyrgjødsel, ca. 11 kg total-N/daa om våren + 6 kg N i mineralgjødsel etter 1. slått

C. Frøblandingar

- C1: Gras (60 % timotei, 30 % engsvingel og 10 % engrapp)
- C2: Gras + 10 % raudkløver + 5 % kvitkløver
- C3: Gras + 20 % raudkløver + 10 % kvitkløver

På Tjøtta og Fureneset var gjødsling på storruter, pakking på medium store ruter og frøblandingar på småruter. På Løken var det pakking på store ruter og gjødsling og frøblandingar på småruter. Pakking vart utført etter kvar slått ved køyring fram og tilbake hjul i hjul på tvers av rutene (dobbelt spordekking). Detaljerte opplysningar om traktorar og lufttrykk er gitt hos Rivedal et al. (2016).

Husdyrgjødsel var tilført som gylle – om lag halvblanding av blautgjødsel storfe og vatn – i lik mengd til alle ruter om våren. Ein streva etter å tilføre 11 kg total-N per dekar, men analysar av husdyrgjødsela viste at mengdene varierte i praksis frå 7 til knapt 13 kg N/daa (Rivedal et al. 2016). Tilleggsgjødsling med 6 kg N etter førsteslåtten vart tilført som NPK-gjødsel.

I fjerde og femte engår på Fureneset vart gjødslinga på B2 auka på C1 og C2, medan ein på C3 heldt fram med same gjødslinga som i ára før. Den auka gjødslinga var i tillegg til gylle 6 kg N om våren, 9 kg N etter første slått og 5 kg N etter andre slått. N vart tilført som fullgjødsel N-P-K (22-2-12). Det vart også teke tre haustingar her fjerde- og femte engåret og ein brukte eit høgare lufttrykk i dekka på den tunge traktoren (Rivedal et al. 2016).

Sortsval i frøblandingane vart tilpassa til forsøksstadene. ‘Grindstad’ timotei og ‘Fure’ engsvingel vart brukte på Fureneset, medan ei halvblanding av ‘Grindstad’ og ‘Noreng’ timotei og av ‘Fure’ og ‘Norild’ engsvingel vart nytta på Tjøtta og Løken. ‘Knut’ engrapp og ‘Lea’ raudkløver vart brukt alle stader, medan ‘Sonja’ kvitkløver vart brukt på Fureneset og ‘Snowy’ kvitkløver på Tjøtta og Løken. Det vart brukt 3 kg såfrø per dekar alle stader. Havre vart brukt som dekkvekst på Fureneset og Tjøtta, medan feltet på Løken vart sådd utan dekkvekst.

Felta er hausta med avlingsregistrering to gonger per sesong. Ved hausting er det teke ut prøver til bestemming av tørrstoff ved tørking i to døgn ved $60^{\circ}C$. Tørkeprøvene er vidare brukte til kvalitetsanalyse. Før kvar hausting er det utført skjønsmessig botanisk analyse. I tillegg vart det teke ut

prøver til botanisk analyse ved sortering ved førsteslått både første- og tredje engåret. På Fureneset vart i tillegg andreslåtten sortert femte engåret. Prøvene vart sorterte artsvis for sådde artar, andre gras og tofrøbla ugras og vege etter tørking. Sorteringa vart i hovudsak gjort på frosne prøver utover vinteren.

Bestanden av raudkløver er følgd gjennom forsøksperioden ved at plantetalet av raudkløver vart talt to gonger i sesongen i 5 sårader à 1 m på ruter med kløver.

Kvalitetsanalyse er utført på tørka prøver ved hjelp av NIRS-analyse ved NIBIO Løken (Fystro og Lunnan 2006). Her er det eit breitt kalibreringsgrunnlag med ulik botanisk samansetjing av gras og kløver.

Nitrogenopptak er rekna ut som eit produkt av avling og N-innhald (ráprotein/6,25). Biologisk nitrogenfiksering er estimert med differansemetoden. Fiksert mengd blir da rekna ut som differansen i nitrogenopptak mellom ruter med og utan kløver. Dette er eit grovt estimat som føreset at grasruter og kløverblanda ruter har likt opptak av nitrogen frå jord og gjødsel. Vidare er estimatet for lågt på grunn av at mykje fiksert nitrogen blir bunde i stubb og røter, og noko også i jorda. I ein dansk modell (Høgh-Jensen et al. 1998) blir det rekna med at den totale fikseringa er rundt 50 % høgare enn det ein finn att i hausta avling.

Statistisk analyse er utført ved hjelp av variansanalyse med GLM i MINITAB, versjon 16. Ved feltvis analyse er gjentak brukt som tilfeldig variabel og forsøket analysert som split-plot. Ved analyse over felt er felt og gjentak innan felt rekna som tilfeldige variablar og dei faste effektane er testa mot sine samspel med felt. For pakkingseffekten på Løken-feltet er avlinga i førsteslåtten første engåret i tillegg brukt som kovariat, da dette reduserte forsøksfeilen og gav sikrare resultat. På dei andre felta gav ikkje kovariat mindre feil, og er derfor ikkje brukt.

Utslag for køyring er i nokre tilfelle presenterte som to kontrastar, der kvadratsummen for køyring er delt i lett versus tung traktor og i køyring versus utan køyring for å lette tolkinga av forsøket. Deling er i nokre tilfelle også gjort for frøblanding, med gras versus kløver og i 15 % versus 30 % kløver.

Resultata er presenterte med middeltal, standardavvik (SE) for middeltala og p-verdiar. P-verdiar under 0,15 er viste i tabellane, høgare verdiar er merka i.s. (ikkje signifikant).



Bilete 3. Lett og tung traktor brukt til pakking på Tjøtta. Foto: Ievina Sturite.

3 Resultat

3.1 AVLING

3.1.1 Effektar av traktorkøyring

Utslaga av traktorkøyring varierte mellom stader, og gjennomsnittstal for kvar stad er presenterte i Tabell 3.1. Det var stort negativt avlingsutslag for køyring på Løken (20 % nedgang), litt på Fureneset (6 %) og ingen utslag på Tjøtta (0 %). Det var ikkje statistisk sikre forskellar mellom lett og tung traktor, men på Fureneset var det klar tendens til størst avlingsnedgang ved bruk av tung traktor. Fjerde- og femte engåret vart det også teke ein tredjeslått på Fureneset. Her var det sikker avlingsnedgang for køyring og også sikkert større avlingsnedgang for bruk av tung versus lett traktor. Gjennomsnittleg avling i tredjeslåtten var 176 kg tørrstoff/daa utan køyring, 145 kg ved bruk av lett traktor og 105 kg ved bruk av tung traktor.

Tabell 3.1. Avlingsutslag (kg ts/daa) for traktorkøyring på forsøksstadene. Middel av to år for førsteslått og sumavling og for tre år i andreslått på Tjøtta, og for fire år i førsteslått og fem år i andreslått på Fureneset og Løken. Middel av ulike frøblandingar og gjødslingar

	Fureneset			Tjøtta			Løken		
	1. sl	2. sl	Sum	1. sl	2. sl	Sum	1. sl	2. sl	Sum
Utan køyring	595	297	979	435	331	741	369	267	649
Lett traktor	600	280	953	445	323	744	294	195	503
Tung traktor	585	259	898	438	314	730	310	209	530
SE	15,3	5,9	19,8	8,6	5,7	10,7	6,2	7,7	9,1
p lett vs tung	i.s.	0,07	0,12	i.s.	i.s.	i.s.	i.s.	i.s.	i.s.
p køyring	i.s.	0,02	0,09	i.s.	i.s.	i.s.	<0,001	0,002	<0,001

Det var ikkje samspel mellom frøblanding og køyring, det vil seie at meiravlinga for bruk av kløver i frøblandinga var uavhengig av køyring.

På Løken var det samspel mellom køyring og gjødsling ($p=0,04$). Avlingsutslaget for tilleggsgjødsling var her litt mindre med enn utan køyring (Tabell 3.2).


Tabell 3.2. Meiravling (kg ts/daa) ved bruk av 6 kg N i tillegg til husdyrgjødsel ved ulike pakkingar for feltet på Løken

	Husdyrgjødsel	Meiravling for 6 kg N
Utan køyring	568	+ 157
Lett traktor	420	+ 132
Tung traktor	482	+ 136

3.1.2 Effektar av frøblanding og gjødsling

Avlingsutslaget for gjødsling var høgare for reint gras enn for kløverblandingar (Figur 3.1). I middel for felta var meiravlinga for gjødsling med 6 kg N etter førsteslått 197 kg tørrstoff/daa for reint gras og 101 kg tørrstoff/daa for kløverblandingar (samspel $p=0,009$). Størsteparten av avlingsutslaget for gjødsling kom i andreslåtten, men det var også ein liten positiv ettereffekt av gjødsling på avlinga i førsteslåtten året etter. Bruk av kløver i frøblandinga hadde i middel litt større avlingseffekt enn gjødsling med 6 kg N til gras.

Såmengda av kløver hadde mindre å seie. I middel gav bruk av 30 % kløver i såfrøet 22 kg tørrstoff per dekar og år meir enn bruk av 15 % kløver. Meiravlinga var ikkje statistisk signifikant på grunn av ulikt utslag dei tre stadene. Størst meiravling hadde feltet på Fureneset med 48 kg tørrstoff per dekar og år ($p=0,02$), feltet på Løken hadde ei meiravling på 18 kg ($p=0,15$) medan feltet på Tjøtta ikkje hadde utslag i det heile (0 kg, i.s.).



Figur 3.1. Avling (kg tørrstoff/daa) ved ulik frøblanding og gjødsling, middel av tre felt, tre engår og tre køyringssledd.

3.2 Plantebestand

Plantebestanden var sterkt prega av dei sådde artane på alle forsøksstadene (Tabell 3.3). Fureneset hadde sterkare dominans av timotei frå starten enn Løken og Tjøtta. Frå første til tredje året gjekk engsvingel mykje fram alle stader, og timotei gjekk tilbake, sterkest på Tjøtta. Ved sortering på Fureneset i andreslätten femte engåret var det derimot meir timotei i forhold til engsvingel. Det var lite engrapp første året, og engrapp er her teke med under andre gras. Engrapp kom litt inn tredje året, spesielt på Løken, der engrapp fortsette å auke fjerde- og femte året, da nokre ruter vart noterte til over 40 % engrapp i andreslätten. Raudkløver etablerte seg bra alle stader. Raudkløver heldt bestanden godt oppe også tredje året på Tjøtta og Løken, men gjekk tilbake på Fureneset. Løken hadde meir kvitkløver enn dei andre felta, men også Fureneset fekk mykje kvitkløver i andreslätten femte engåret. Tofrøblada ugras auka frå første- til tredje engåret, mest på Tjøtta, og det var også sterkt auke frå tredje til femte engåret på Fureneset.

Tabell 3.3. Oversyn over plantebestanden (% av tørrstoff) i forsøka på Fureneset, Løken og Tjøtta. Middel av alle ruter ved sortering av prøver i førsteslått første- og tredje engår, samt ved sortering i andreslåtten femte engår på Fureneset

	Fureneset			Tjøtta		Løken	
	År 1	År 3	År 5	År 1	År 3	År 1	År 3
Timotei	70,2	59,4	51,8	46,2	18,8	42,8	33,5
Engsvingel	5,6	31,0	15,3	31,7	59,6	26,9	29,4
Engrapp	-	0,3	-	-	0,7	-	7,0
Andre gras	3,1	0,1	0,7	3,4	0,2	0,6	1,1
Raudkløver	20,0	6,3	6,7	13,5	11,1	16,0	14,3
Kvitkløver	0,9	1,0	17,1	1,5	1,1	10,7	10,1
Tofrøbl. ugras	0,2	1,9	8,4	3,6	8,5	3,0	4,7

Av andre gras var det på Løken-feltet litt tunrapp (*Poa annua*) på dei fleste rutene, og på nokre ruter var det sølvbunke (*Deschampsia cespitosa*), siv (*Juncus spp.*), knereverumpe (*Alopecurus geniculatus*) eller engkvein (*Agrostis capillaris*). På Tjøtta var det noko kveke (*Elymus repens*) og ein del tunrapp og engkvein. På Fureneset var det mest av tunrapp og markrapp (*Poa trivialis*).

Av tofrøblada ugras var det på Løken mest av krypsoleie (*Ranunculus repens*), løvetann (*Taraxacum officinale*) og marikåpe (*Alchemilla spp.*). I tillegg var det innslag av snauveronika (*Veronica serpyllifolia*), engsyre (*Rumex acetosa*), ryllik (*Achillea millefolium*), vier (*Salix spp.*) og linbendel (*Spergula arvensis*). På Tjøtta var det innslag av løvetann, ryllik og høymole (*Rumex longifolius*), medan det på Fureneset var mest av høymole og krypsoleie.

3.2.1 Kløver

3.2.1.1 Effektar av traktorkøyring

Traktorkøyring hadde ingen statistisk signifikante effektar på det totale kløverinnhaldet på nokon av felta ved analyse i førsteslåtten tredje engåret. På Løken reduserte pakking avlinga, men reduksjonen var om lag lik for gras- og kløveravling. Sortering av avlinga i førsteslåtten tredje engåret viste at sjølv om totalt kløverinnhald ikkje var påverka, var samansetjinga av kløveren endra (Tabell 3.4). På Løken dominerte raudkløver på ruter utan køyring med tre til fire gonger meir raudkløver enn kvitkløver, medan det var om lag like mykje av raud- og kvitkløver på ledd med køyring. Planteteljingar på Løken viser også at køyring sette bestanden av raudkløver tilbake. Hausten tredje engåret var det i middel 25 plantar/m² på ruter utan køyring og 18 plantar/m² på ruter med køyring. Sorteringsprøvene frå Tjøtta viste ikkje statistisk signifikante forskjellar for kløver. På Fureneset påverka ikkje køyringa raudkløver, medan det var mest kvitkløver på ledd med køyring. Sortering av andreslåtten femte engåret på Fureneset viste store utslag med meir kvitkløver og mindre raudkløver etter køyring. Her var også det totale kløverinnhaldet høgare etter køyring ($p=0,03$) på grunn av den store auken av kvitkløver.

Tabell 3.4. Verknad av køyring på innhold av raud- og kvitkløver (% av tørrstoff) i førsteslåtten tredje engåret ved sortering på Fureneset, Tjøtta og Løken og i andreslåtten femte engår på Fureneset. Sorterte prøver, middel av ulik gjødsling og av ruter med 15 eller 30 % kløver i såfrøret

	Fureneset år 3		Fureneset år 5		Tjøtta		Løken	
	raudkl	kvitkl	raudkl	kvitkl	raudkl	kvitkl	raudkl	kvitkl
Upakka	8,7	0,9	13,3	15,1	18,5	0,5	29,0	8,6
Lett traktor	11,1	1,5	9,4	28,3	15,1	0,9	15,2	19,7
Tung traktor	8,6	2,1	7,3	29,9	14,6	0,9	20,1	16,8
SE	1,9	0,2	0,5	2,1	3,5	0,5	3,3	1,5
p lett vs tung	i.s.	0,11	0,04	i.s.	i.s.	i.s.	i.s.	i.s.
p køyring	i.s.	0,03	0,001	0,006	i.s.	i.s.	0,05	0,006



Bilete 4. Køyring gav mindre raudkløver og meir kvitkløver. Foto: Synnøve Rivedal


3.2.1.2 Effektar av gjødsling og frøblanding

Den sterkeste gjødslinga reduserte kløverinnhaldet på alle felta (Tabell 3.5). Ved sortering av prøver tredje engåret var kløverinnhaldet 27 % på tørrstoffbasis med berre husdyrgjødsel og 16 % med tilleggsgjødsling med 6 kg N/daa etter førsteslåtten. Det var nedgang både for raud- og kvitkløver.

Tabell 3.5. Kløver (% av tørrstoff). Sorterte prøver i førsteslått tredje engår, effektar av ulik gjødsling. Middel av tre felt

	Raudkløver	Kvitkløver	Sum kløver
Husdyrgjødsel	20,2	7,0	27,2
Husdyrgj. + 6 kg N	11,1	4,5	15,7
SE	1,3	1,1	2,1
p-verdi	0,04	i.s.	0,06

Den sterkeste gjødslinga reduserte også plantetalet for raudkløver (Figur 3.2). Nedgangen var statistisk sikker ($p<0,05$) fra og med hausten første engåret. Nedgangen i kløverinnhold med sterke gjødsling i sorteringsprøvene var sterke enn det nedgangen i plantetalet tilseier. Mindre kløver ved sterke gjødsling var derfor eit resultat både av lågare plantetal og lågare avling per plante.




Figur 3.2. Plantetal av raudkløver ved ulik gjødsling om hausten. Middel av tre felt, tre nivå av køyring og to såmengder.

Høg såmengd av kløver verka positivt inn på innhaldet av raudkløver i starten av forsøket, men effekten minka med tida (Tabell 3.6). Sorteringsprøver første engåret gav i middel 6,0 prosent-einingar høgare innhald av raudkløver ved bruk av 30 % kløver i såfrøet enn ved bruk av 15 %. Effekten var ulik for forsøksstadene, og utslaget er ikkje statistisk sikkert for alle felta sett under eitt ($p=0,17$). På Fureneset var det ikkje sikker skilnad mellom såmengdene, medan Tjøtta hadde ein auke på 7,1 %-eininger ($p=0,005$) ved bruk av 30 % kløver og Løken ein auke på 10,3 %-eininger ($p=0,002$). Tredje engåret var det ikkje statistisk sikre utslag på kløverinnhaldet på Fureneset og Tjøtta, men på Løken var det 5,5 %-eininger høgare innhald av raudkløver ved bruk av 30 % kløver i såfrøet ($p=0,01$). På Løken var det også ein tendens til meir kvitkløver der det var sådd minst kløver ($p=0,10$). Innhaldet av kvitkløver var elles ikkje påverka av såmengda.

Tabell 3.6. Kløver (% av tørrstoff) ved ulik såmengd i sorterte prøver i førsteslått første- og tredje engår. Middel av tre felt, tre nivå av køyring og to gjødslinger

	Raudkløver		Kvitkløver	
	1. engår	3. engår	1. engår	3. engår
15 % kløver	21,7	14,6	6,0	6,2
30 % kløver	27,7	16,7	6,7	5,3
SE	2,0	1,2	0,7	0,5
p-verdi	i.s.	i.s.	i.s.	i.s.

Planteteljingar av raudkløver viste også at forskjellen mellom bruk av 15 % og 30% kløver i såfrøet minka med aukande engalder (Figur 3.3). Likevel var det statistisk sikker forskjell også tredje engåret ($p=0,04$), slik at det ikkje jamna seg heilt ut.



Figur 3.3. Plantetal per m² av raudkløver ved 15 % og 30 % kløver i såfrøet. Gjennomsnitt av tre forsøksstader, tre nivå av køyring og to gjødslinger.

3.2.2 Sådde grasartar

3.2.2.1 Effektar av traktorkøyring

Traktorkøyring hadde små effektar på grasbestanden, men sorteringsprøvene tredje engåret viste i middel at køyring førte til auke i engsvingel og tendens til nedgang i timotei (Tabell 3.7). Utslaget var sikrast på Fureneset. Det var ingen forskjellar mellom køyring med lett eller tung traktor.

Tabell 3.7. Innhold av timotei, engsvingel og engrapp i sorteringsprøver av førsteslått tredje engår. Middel av tre felt og ulike gjødslinger og frøblandingar

	Timotei	Engsvingel	Engrapp
Upakka	40,5	35,2	2,6
Lett traktor	35,5	42,1	2,8
Tung traktor	35,7	42,6	2,6
SE	2,5	1,9	0,1
p lett vs tung	i.s.	i.s.	i.s.
p køyring	i.s.	0,04	i.s.

3.2.2.2 Effektar av gjødsling og frøblanding

Både gjødsling og frøblanding verka inn på forholdet mellom timotei og engsvingel i enga (Tabell 3.8). Tillegsgjødsling med 6 kg N førte til auka timoteiinnhaldet, medan innhaldet av engsvingel og engrapp ikkje vart påverka. Tilsetjing av kløver i frøblandinga reduserte innhaldet av gras. Dette gjekk i særleg grad ut over engsvingel, medan timoteiinnhaldet heldt seg oppe. Forholdet mellom timotei og engsvingel var derfor sterkt påverka av kløver i frøblandinga, og gjekk opp med stigande kløverandel. Det

var lite engrapp dei tre første engåra, og denne arten vart ikkje påverka av gjødsling og frøblanding med unnatak for feltet på Løken der gjødsling auka engrappinnhaldet.

Tabell 3.8. Effekt av gjødsling og frøblanding på innhaldet av timotei, engsvingel og engrapp (% av tørrstoff) i sorterte prøver i førsteslått tredje engår. Middel av tre felt

	Timotei	Engsvingel	Engrapp
Husdyrgjødsel	31,8	41,8	2,1
Husdyrgj. + 6 kg N	42,6	38,2	3,2
SE	0,8	1,5	0,6
p gjødsling	0,01	i.s.	i.s.
Gras	35,3	52,8	3,2
Gras + 15 % kløver	37,7	34,5	2,6
Gras + 30 % kløver	38,7	32,7	2,2
SE	2,3	1,7	0,4
p frøblanding	i.s.	0,002	i.s.

3.2.3 Ugras

3.2.3.1 Effektar av traktorkøyring

Køyring med traktor gav ingen effektar på ugrasinnhaldet på Fureneset og Tjøtta dei tre første åra. På Løken førte køyring til meir grasugras, sjølv om ugrasmengda var lita (Tabell 3.9). Utslaget var størst ved svak gjødsling (samspel pakking x gjødsling $p=0,04$). Det var ingen forskjellar mellom lett og tung traktor.

Tabell 3.9. Innhald av grasugras (% av tørrstoff) på feltet på Løken ved sortering i førsteslått tredje engår

	Grasugras		
	middel	husdyrgj	hg + 6 kg N
Utan traktorkøyring	0,1	0,1	0,2
Med traktorkøyring	1,5	2,2	0,8
p-verdi køyring	0,01		

Frøblanding og gjødsling gav ingen statistisk sikre utslag på tofrøblada ugras på Fureneset og Tjøtta dei tre første åra. På Løken var det mest tofrøblada ugras på graserter utan sådd kløver, og mest på upakka jord (samspel køyring x frøblanding $p=0,004$) (Tabell 3.10).

Tabell 3.10. Innhald av tofrøblada ugras (% av tørrstoff) i ulike frøblandingar på feltet på Løken ved sortering i førsteslått tredje engår

	Gras	15 % kløver	30% kløver
Utan traktorkøyring	13,8	3,7	2,4
Med traktorkøyring	5,4	2,7	3,0

På Fureneset auka innhaldet av tofrøblada ugras mykje med aukande engalder, og femte engåret var det klart høgast innhald på ruter utan traktorkøring (Tabell 3.11).

Tabell 3.11. Innhold av tofrøblada ugras (% av tørrstoff) i ulike frøblandingar på feltet på Fureneset ved sortering i førsteslått tredje engår og i andreslått femte engår

	3. engår	5. engår
Utan traktorkøring	2,7	15
Køyring med lett traktor	1,1	8
Køyring med tung traktor	1,8	5



Bilete 5. Ugrasinnhaldet auka med engalder, og auken var størst på ruter utan køyring. Foto: Synnøve Rivedal

3.3 Fôrkvalitet

3.3.1 Energiverdi, innhald av fiber (NDF, ufordøyeleg NDF)

Traktorkøring gav små utslag på energiverdi og fiberinnhald, men i andreslatten var det lågare innhald av NDF og høgare energiverdi på ruter med køyring (Tabell 3.12). Utslaget var størst på Løken-feltet, som også hadde størst avlingsutslag av pakking. Det var ikkje forskjellar mellom køyring med lett eller tung traktor.

Tabell 3.12. Energiverdi, FEm per kg tørrstoff, og innhold av NDF (% av tørrstoff) og ufordøyelag NDF (% av tørrstoff).
Middel over felt og år. Hovudeffektar av traktorkøring, gjødsling og frøblanding

	Energi, FEm/kg ts		Uford. NDF		NDF	
	1. sl	2. sl	1. sl	2. sl	1. sl	2. sl
Utan traktorkøring	0,830	0,854	9,2	7,2	58,5	53,9
Med traktorkøring	0,836	0,867	9,0	6,8	58,1	52,7
SE	0,005	0,003	0,15	0,13	0,4	0,1
p-verdi	i.s.	0,01	i.s.	0,08	i.s.	<0,001
Husdyrgjødsel	0,834	0,874	8,6	6,2	56,8	50,5
Husdyrgj. + 6 kg N	0,833	0,849	8,8	7,0	58,8	55,7
SE	0,001	0,011	0,14	0,47	0,3	1,1
p-verdi	i.s.	i.s.	i.s.	i.s.	0,04	0,08
Gras	0,845	0,891	8,4	5,6	59,1	53,7
Gras + kløver	0,828	0,848	8,8	7,1	57,2	52,8
SE	0,003	0,010	0,14	0,35	0,2	0,5
p-verdi	0,03	0,06	0,02	0,05	0,002	i.s.

Gjødsling gav små utslag på energi og fiber i førsteslatten. Dette er ikke uventa, da vårgjødslinga var lik. I andreslatten gav den sterkeste gjødslinga auka fiberinnhald og nedsett energiverdi. Mindre fiber kan i stor grad kan tilskrivast mindre kløver ved den sterkeste gjødslinga, men effekta av gjødsling på graset kan også ha verka inn.

Blandingar med kløver gav lågare energiverdi enn reint gras i begge slåttar (Tabell 3.12). Gras i reinbestand gav lågare avling enn kløverblandingane, og avlinga var i stor grad avgrensa av mangel på nitrogen. Dette gav svakare planteutvikling og høgare energiverdi i graset. Kløveren hadde kraftigare vekst, som saman med betre nitrogenforsyning til graset gav større avlingar, men lågare energiverdi og meir ufordøyelag fiber. Det totale fiberinnhaldet (NDF) gjekk derimot noko ned i kløverblandingane. Det var ikke forskjellar mellom bruk av 15 og 30 prosent kløver i såfrøet.

3.3.2 Protein, aske og vassløyseleg karbohydrat

Traktorkøring verka lite inn på innhaldet av protein, aske og vassløyseleg karbohydrat i føret (Tabell 3.13). Det var tendensar til høgare innhald av vassløyseleg karbohydrat med køring, spesielt i andreslatten. Det var ingen forskjellar mellom tung og lett traktor.

Gjødsling etter førsteslatten gav lågare proteininnhald både i andreslatten og i førsteslatten året etter (Tabell 3.13). Dette kan forklaraast med nedgangen i kløverbinnhald med sterke gjødsling. Nedgang i askeinnhald kan også forklaraast med kløveren. For vassløyseleg karbohydrat var det ikke statistisk sikre utslag for gjødsling.

Bruk av kløver i frøblandinga gav store effekta (Tabell 3.13) gjennom auka proteininnhald, auka askeinnhald og lågare innhald av vassløyseleg karbohydrat. Det var ikke statistisk sikre forskjellar mellom bruk av 15 og 30 % kløver i såfrøet.

**Tabell 3.13. Råprotein, aske og vassløyseleg karbohydrat, alt som prosent av tørrstoff. Middel over felt og år.
Hovudeffektar av traktorkøring, gjødsling og frøblanding**

	Råprotein		Aske		Vassl. karbohydrat	
	1. sl	2. sl	1. sl	2. sl	1. sl	2. sl
Utan traktorkøring	11,3	12,8	5,4	6,4	17,0	17,1
Med traktorkøring	11,2	13,0	5,4	6,4	17,7	17,8
SE	0,11	0,09	0,04	0,07	0,3	0,2
p-verdi	i.s.	0,15	i.s.	i.s.	i.s.	0,07
Husdyrgjødsel	12,0	13,7	5,8	6,7	16,9	17,5
Husdyrgj. + 6 kg N	11,1	12,6	5,2	6,3	17,8	17,3
SE	0,22	0,11	0,10	0,08	0,2	0,6
p-verdi	0,11	0,02	0,06	0,07	0,11	i.s.
Gras	9,9	11,5	4,8	5,9	20,5	20,6
Gras + 15 % kløver	12,3	14,0	5,8	6,9	16,0	15,8
Gras + 30 % kløver	12,5	13,8	5,9	6,8	15,5	15,8
SE	0,25	0,23	0,13	0,20	0,3	0,8
p-verdi gras vs kløver	0,002	<0,001	0,003	0,02	<0,001	0,008

3.4 Nitrogenopptak og nitrogenfiksering

3.4.1 Nitrogenopptak

3.4.1.1 Effekt av traktorkøring

Traktorkøring reduserte nitrogenopptak i avlinga på Løken og i andreslatten på Fureneset, medan det var små effektar på Tjøtta (Tabell 3.14). For sumavlinga var nedgangen ved køying 18 % på Løken, 8 % på Fureneset og 0 % på Tjøtta. Det var ikke forskjellar mellom lett og tung traktor på Løken og Tjøtta, medan det var lågast N-opptak ved bruk av tung traktor på Fureneset.

Tabell 3.14. N-opptak (kg/daa) ved ulik traktorkøring. Middel av gjødslinger og frøblandingar, og av fire år for førsteslått og fem år for andreslått for Fureneset og Løken, og av to år for førsteslått og tre år for andreslått på Tjøtta

	Fureneset		Tjøtta		Løken	
	1. slått	2. slått	1. slått	2. slått	1. slått	2. slått
Utan køying	8,1	5,7	9,8	7,4	6,8	5,4
Lett traktor	8,2	5,4	10,0	7,7	5,4	3,9
Tung traktor	7,6	5,0	9,5	7,1	6,1	4,5
SE	0,14	0,03	0,20	0,15	0,44	0,44
p lett vs tung	0,04	0,02	i.s.	i.s.	i.s.	i.s.
p køying	i.s.	<0,001	i.s.	i.s.	0,10	0,09

På Løken var det tendens til samspel mellom køyring og gjødsling slik at det negative utslaget for køyring på nitrogenopptak var størst ved den sterkeste gjødslinga ($p=0,09$) (Tabell 3.15).

Tabell 3.15. N-opptak (kg/daa) ved ulik gjødseling med og uten køyring på Løken

	N-opptak, sum 1. og 2. sl.		
	Upakka	Køyring	Nedgang
G1 husdyrgjødsel	11,5	9,5	2,0
G2 husdyrgj. + 6 kg N	13,8	11,1	2,7

3.4.1.2 Effekt av frøblanding og gjødsling på N-opptak

Innblanding av kløver i såfrøet gav stort positivt utslag på N-opptaket (Tabell 3.16). Det var ikke statistisk signifikant utslag av såmengd for kløver på 5 % nivå, men klar tendens til større opptak ved den største såmengda.

Tabell 3.16. Effekt av frøblanding på N-opptak. Middel av tre felt, tre engår, tre nivå av køyring og to nivå av gjødsling

	N-opptak		
	1. slått	2. slått	Sum
Reint gras	5,7	3,6	9,2
Gras + 15 % kløver	8,4	6,5	14,9
Gras + 30 % kløver	8,8	6,6	15,4
SE	0,25	0,38	0,57
SE kløver	0,16	0,03	0,17
p-verdi gras vs kløver	<0,001	0,007	0,003
p-verdi 15 % vs 30 %	0,15	0,11	0,13



Bilete 6. Innblanding av kløver i såfrøet gav stort positivt utslag på N-opptaket. Foto: Ievina Sturite.

Verknaden av gjødsling på N-opptak var mykje høgare for reint gras enn for blandingar med kløver (Tabell 3.17). Det var lik gjødslingseffekt for 15 og 30 % kløver i såfrøet. Det var tendens til negativ verknad av gjødsling på N-opptaket i førsteslätten i blandingar med kløver. Dette kan skuldast at gjødslinga sette kløveren tilbake. I middel for felta fekk ein att 3,5 kg N i avlinga for 6 kg N i gjødsel på grasrutene. Dette gjev ein utnyttingsgrad på 58 %. Utnyttinga av gjødsla var best på Fureneset der ein fekk att 4,4 kg N i avlinga, medan ein på Løken fekk att 3,3 kg og på Tjøtta 3,0 kg.

Tabell 3.17. Effekt av gjødsling på N-opptak i reint gras og blandingar med kløver. Middel av tre felt, tre engår og tre nivå av køyring

	1. slått			2. slått			Sum		
	Hg	Hg + 6	Diff.	Hg	Hg + 6	Diff.	Hg	Hg + 6	Diff.
Reint gras	5,7	5,7	0,0	1,8	5,3	3,5	7,5	11,0	3,5
Gras + kløver	8,8	8,4	-0,4	5,8	7,3	1,5	14,6	15,7	1,1
p samspel			i.s.			0,01			0,02

3.4.2 Nitrogenfiksering

Mengd fiksert nitrogen i kløver målt med differansemetoden var i middel høgst i feltet på Tjøtta og lågast i feltet på Løken (Tabell 3.18). På Tjøtta var mengda opp mot 10 kg N/daa første engåret, men det gjekk mykje ned tredje engåret. På Løken var det omvendt, her gjorde kløveren mindre av seg i starten og gav mest tredje- og fjerde engåret. Kløveren heldt veldig godt ut på Fureneset og Løken og gav betydeleg N-bidrag også femte engåret.

Tabell 3.18. N-fiksering målt med differansemetoden på forsøksstadene. Middel over traktorkøyring, gjødsling og såmengder av kløver

	Fiksert N, kg/daa					
	1. engår	2. engår	3. engår	4. engår	5. engår	Middel
Fureneset	5,8	7,1	5,0	7,2	6,0	6,2
Tjøtta	8,0	9,5	5,3	-	-	7,6
Løken	2,5	4,0	6,2	7,3	5,0	5,0

3.4.2.1 Effekt av traktorkøyring

Traktorkøyring hadde liten effekt på estimert N-fiksering på Løken (Tabell 3.19). Det var ein tendens til høgare mengder fiksert N ved køyring på Fureneset, medan det var ingen utslag på Tjøtta og Løken. Høgare mengd ved køyring på Fureneset kan skuldast meir kvitkløver på ruter med køyring. Det var ikkje statistisk sikre skilnader mellom lett og tung traktor, men på Tjøtta var det ein tendens til større fiksering etter køyring med lett- enn med tung traktor i førsteslätten.

Tabell 3.19. Estimert N-fiksering (kg/daa) ved ulik traktorkøring. Middel av fire år for førsteslått og fem år for andreslått for Fureneset og Løken, og av to år for førsteslått og tre år for andreslått på Tjøtta. Middel av to gjødslingar og to såmengder for kløver

	Fureneset		Tjøtta		Løken	
	1. slått	2. slått	1. slått	2. slått	1. slått	2. slått
Utan køring	2,0	3,1	4,0	4,3	3,1	2,2
Lett traktor	2,2	3,6	4,3	3,9	3,2	2,2
Tung traktor	2,7	3,4	3,3	3,5	3,0	2,1
SE	0,22	0,18	0,28	0,38	0,18	0,19
p lett vs tung	i.s.	i.s.	0,06	i.s.	i.s.	i.s.
p køyring	0,13	0,09	i.s.	i.s.	i.s.	i.s.

3.4.2.2 Effekt av frøblanding og gjødsling på N-fiksering

Den største såmengda av kløver gav i middel 0,5 kg N høgare estimert fiksering enn den minste såmengda, men forskjellen var ikke signifikant på 5 % nivå (Tabell 3.20). Utslaget var størst på Fureneset, der 30 % kløver i såfrøet gav 1,1 kg høgare estimert fiksering enn 15 % kløver ($p=0,03$). Det var større utslag mellom såmengder i første- enn i andreslåtten.

Tabell 3.20. Effekt av frøblanding på estimert N-fiksering. Middel av tre felt, tre engår, tre nivå av køyring og to nivå av gjødsling

	N-fiksering		
	1. slått	2. slått	Sum
Gras + 15 % kløver	2,7	3,0	5,7
Gras + 30 % kløver	3,1	3,1	6,2
SE	0,13	0,02	0,14
p-verdi	0,15	0,11	0,13

Gjødsling med 6 kg N/daa i mineralgjødsel etter førsteslåtten reduserte N-fikseringa i middel med 2,5 kg/daa (Tabell 3.21). Effekten av gjødsling varierte mellom felt med størst utslag på Fureneset der fikseringa vart redusert med 3,6 kg N/daa ($p=0,009$), medan nedgangen på Tjøtta var 2,5 kg/daa ($p=0,02$) og på Løken 1,3 kg ($p=0,08$). Størsteparten av nedgangen kom i andreslåtten, men det var litt nedgang også i førsteslåtten året etter.

Tabell 3.21. Effekt av gjødsling på estimert N-fiksering. Middel av tre felt, tre engår, tre nivå av køyring og to nivå av frøblandingar

	N-fiksering		
	1. slått	2. slått	Sum
Husdyrgjødsel	3,1	4,1	7,2
Husdyrgj. + 6 kg N	2,7	2,0	4,7
SE	0,13	0,46	0,47
p-verdi	0,18	0,09	0,07

4 Diskusjon

4.1 Effektar av traktorkøyring

Traktorkøyring reduserte avlingane sterkast på siltjorda på Løken. Denne jorda hadde lågare luftpermeabilitet og lite store porer etter køyring (Rivedal et al. 2016). I tillegg var det fuktige forhold ved fleire av haustingane som forverra situasjonen. Den siltige sandjorda på Fureneset fekk også redusert porevolum etter køyring, men gav mindre avlingsutsLAG av køyring enn på Løken. Sandjorda på Tjøtta hadde god luftveksling, og køyring verka her lite inn på avlingane. Store avlingsutsLAG av jordpakking på siltjord er også funne i svenske granskingar i Röbäcksdalen ved Umeå (Håkansson 1973).

Vekta på traktoren hadde mindre å seie i denne granskinga. På Løken-feltet var det like stor avlingsnedgang etter bruk av lett- som av tung traktor. Det var likt lufttrykk i dekka på begge traktorane, og penetrometermåLINGAR viste at pakkingseffekten var om lag like stor i det øvste jordlaget for begge traktorane (Rivedal et al. 2016). Den minste traktoren hadde smalare dekk og fekk fleire køyringar på ruta ved køyring hjul i hjul, og dette kan i nokon grad ha jamna ut pakkingseffekten mellom traktorane. Resultata frå forsøka tyder ikkje på at negative utsLAG av jordpakking blir mindre ved høgare gjødslingsnivå. Tvert i mot var det tendensar til større avlingstap av køyring ved den sterkeste gjødslinga på Løken-feltet.

Den botaniske samansetjinga i enga vart i nokon grad påverka av køyring, særleg i feltet på Løken. Effekten var mest tydeleg for kløver, der raudkløver gjekk tilbake og kvitkløver fram på ruter med køyring. Det var også meir av tofrøbla urter på upakka ledd, medan det var meir grasugras på pakka ledd. Meir av raudkløver og urter på upakka ledd tyder på at desse artene set større krav til luftveksling i jorda enn kvitkløver og grasartar. Raudkløver og mange urter har pålerot som går djupare i jorda, medan kvitkløver og gras har hovudtyngda av røtene nær jordoverflata. Hansen (1996) fann også meir kvitkløver i forhold til raudkløver og meir grasugras etter jordpakking. Resultata våre tyder også på at engsvingel er litt meir tolerant for køyring enn timotei.

Traktorkøyring gav små utsLAG på forkvalitet, men i andreslatten var det lågare innhald av NDF og høgare energiverdi på ruter med køyring. UtsLAGet var størst på Løken-feltet, som også hadde størst avlingsutsLAG av pakking. Dette kan skuldast kraftigare plantevækst på ruter utan køyring. Noko kan også skuldast overgang frå raudkløver på ruter utan køyring til meir kvitkløver på ruter med køyring. Køyring verka i liten grad inn på proteininnhaldet. Nitrogenopptak og nitrogenfiksering hos kløver gjekk ned med køyring på Løken-feltet i takt med avlingsnedgangen.

4.2 Effektar av gjødsling etter førsteslatten

Gjødsling med 6 kg N etter førsteslatten gav stor avlingseffekt på alle felt, men utsLAGet var mykje større i graseng enn i kløverblanda eng. Gjødslinga førte til stor nedgang i kløverinnhald og nitrogenfiksering. Estimert N-fiksering i enga vart i middel redusert frå 7,2 kg N/daa til 4,5 kg N/daa, eller med 38 %. Dette viser at kløverinnhaldet i enga er svært følsamt for nitrogengjødsling og blir mykje redusert sjølv ved moderate gjødslingsnivå med mineralgjødsel. Gjødsling verka også inn på samansetjinga av grasartar, og det var tydeleg at timotei gjekk fram og engsvingel tilbake med sterkare nitrogengjødsling. Dette viser at timotei er meir kravfull enn engsvingel med omsyn til nitrogen. Den same effekten fekk ein fram ved at timotei greidde seg betre i blandingar med kløver enn i reint gras. Nitrogenforsyninga til graset var betre i kløverblandinga.

UtsLAGa av gjødsling på forkvalitet kom i stor grad som ein indirekte effekt gjennom effekten på avling og botanisk samansetjing. Lågare proteininnhald etter sterkare N-gjødsling kan til dømes forklarast

gjennom lågare kløverinnhald i enga og god avlingsrespons av gjødslinga. Høgare NDF-innhald ved sterk gjødsling kan også forklarast gjennom mindre kløver.

4.3 Effektar av frøblanding

Tilsetjing av kløver i frøblandinga hadde stor effekt i dette forsøket både på avling, botanisk samansetjing og på fôrqualitet. Kløver hadde vel så stor effekt som gjødsling med 6 kg N på avling. Estimert N-fiksering ut frå nitrogenopptak i avlinga var i middel 7,2 kg N/daa på ruter som berre fekk husdyrgjødsel og 4,5 kg med 6 kg N i tillegg etter førsteslätten. Kløver gav også stor auke i protein- og mineralinnhald, og lågare NDF-innhald i føret. Effekten på energiverdi var derimot negativ i dette forsøket. Også i andre granskingar har kløver gitt noko redusert energiverdi i andreslätten (Steinshamn et al. 2016). Lågare energiverdi i førsteslätten i denne granskinga kan skuldast moderat N-gjødsling til reint gras som ført til lågare avling på reine graserter. Svakare utvikling av graset kan ha ført til lågare stengelandel, mindre lignifisering og høgare energiverdi. Gras i blanding med kløver fekk betre nitrogenforsyning og sterkare strådanning.

Ein auke i såmengda av kløver frå 15 % til 30 % på vektbasis i frøblandinga hadde liten effekt på avling og botanisk samansetjing. Sjølv om det var små utslag, var det positive tendensar for den største såmengda med i middel per år 22 kg høgare tørrstoffavling per år enn den minste såmengda. Det er truleg auke frå 10 til 20 % raudkløver i blandinga som gav utslag; planteteljingar viste stort utslag i talet på raudkløverplantar i starten av forsøksperioden.



Bilete 7. Kløver hadde vel så stor effekt som gjødsling med 6 kg N på avling. Foto: Synnøve Rivedal

5 Konklusjon

Traktorkøring gav stor avlingsnedgang i engfelt på siltjord på Løken i Valdres, medan nedgangen var meir moderat på siltig sandjord på Fureneset i Sunnfjord og det var ingen avlingseffekt på sandjord med god luftveksling på Tjøtta på Helgeland. Det var små forskjellar mellom bruk av lett eller tung traktor i dette forsøket. Resultata viser at ein i størst mogleg grad bør unngå køyring på rå jord som er utsett for pakkingskade. Køyring på siltjord førte til endringar i den botaniske samansettningen i enga ved at raudkløver og tofrøblada ugras gjekk tilbake og kvitkløver og grasugras gjekk fram. Bruk av kløver i frøblandinga gav stor positiv effekt på avling, protein- og mineralinnhald og gav lågare fiberinnhald i føret. Bruk av 6 kg N i mineralgjødsel etter førsteslått gav god avlingseffekt, men sette kløveren sterkt tilbake. Sterkare nitrogengjødsling og bruk av kløver endra grasbestanden i enga i retning av meir timotei og mindre engsvingel. Auke i såmengda av kløver frå 15 % til 30 % på vektbasis gav små utslag på avling og botanisk samansettjing, men likevel ein liten positiv effekt. Køyring reduserte opptak og fiksering av N på siltjorda på Løken, men hadde små effektar på sandjorda på Fureneset og Tjøtta. Bruk av 6 kg N i mineralgjødsel etter førsteslått reduserte N-fikseringa mykje. Auke frå 15 % til 30 % kløver gav i snitt 0,5 kg høgare N-fiksering per dekar.

Litteratur

- Hansen S. 1996. Effects of manure treatment and soil compaction on plant production of a dairy farm system converting to organic farm practice. *Agriculture, ecosystem and environment* 56: 173-186.
- Haraldsen T.K., Sveistrup T.E., Lindberg K. og Johansen T.J. 1995. Jordpakking og ulike dreneringsmåter på torvjord i Nord-Norge. Virkninger på avling og botanisk sammensetning av eng. *Norsk Landbruksforskning* 9: 11-28.
- Høgh-Jensen H., Loges R., Jensen E.S., Jørgensen F.V. og Vinther F.P. 1998. Empirisk model til kvantificering af symbiotisk kvalstoffiksering i bælgplanter. S. 69-86 i 'Kvalstofudvaskning og -balancer i konventionelle og økologiske produktionssystemer. Forskningscenter for Økologisk Jordbrug.
- Håkansson I. 1973. Tung körning vid skörd av slättervall. Tre försök på Röbäcksdalen 1969-1972. SLU Institutionen för markvetenskap. Rapporter från jordbearbetningsavdelingen Nr. 33, 20 s.
- Myhr K. og Njøs A. 1983. Verknad av traktorkjøring, flere slåttar og kalking på avling og fysiske jordeigenskapar i eng. *Meldinger fra Norges Landbrukshøgskole* 62 (1): 1-14.
- Rivedal S., Riley H., Lunnan T., Børresen T., Øpstad S. og Sturite I. 2016. Verknad av traktorkøyring på engavling og jordfysiske forhold. Delrapport fra prosjektet: Proteinrike engbelgvekster under ulike dyrkings- og klimaforhold. NIBIO Rapport 2 (145): 78 s.
- Steinhamn H., Adler S.A., Frøseth R.B., Lunnan T., Torp T. og Bakken A.K. 2016. Yield and herbage quality from organic grass clover leys – a meta-analysis of Norwegian field trials. *Organic Agriculture* 6: 307-322.
- Tveitnes S. og Njøs A. 1974. Køyreskadeforsøk på eng under vestlandstilhøve. *Forskning og forsøk i landbruket* 25: 271-283.
- Ullring U. og Lunnan T. 1993. Kjøreskader under innhøsting i ulike grasarter. I. Virkning på avlingsnivå. *Norsk landbruksforskning. Supplement* 14 (1993): 11-18.
- Volden B., Sveistrup T.E., Jørgensen M. og Haraldsen T.K. 2002. Effects of traffic and fertilization levels on grass yields in northern Norway. *Agricultural and Food Science in Finland* 11: 219-231.

Norsk institutt for bioøkonomi (NIBIO) ble opprettet 1. juli 2015 som en fusjon av Bioforsk, Norsk institutt for landbruksøkonomisk forskning (NILF) og Norsk institutt for skog og landskap.

Bioøkonomi baserer seg på utnyttelse og forvaltning av biologiske ressurser fra jord og hav, fremfor en fossil økonomi som er basert på kull, olje og gass. NIBIO skal være nasjonalt ledende for utvikling av kunnskap om bioøkonomi.

Gjennom forskning og kunnskapsproduksjon skal instituttet bidra til matsikkerhet, bærekraftig ressursforvaltning, innovasjon og verdiskaping innenfor verdikjedene for mat, skog og andre biobaserte næringer. Instituttet skal levere forskning, forvaltningsstøtte og kunnskap til anvendelse i nasjonal beredskap, forvaltning, næringsliv og samfunnet for øvrig.

NIBIO er eid av Landbruks- og matdepartementet som et forvalningsorgan med særskilte fullmakter og eget styre. Hovedkontoret er på Ås. Instituttet har flere regionale enheter og et avdelingskontor i Oslo.